

10/03/1997

Institusi kewangan digesa tawar skim insurans pelajar

SUBANG, Ahad - Menteri Pendidikan, Datuk Seri Najib Tun Abdul Razak, menggesa lebih banyak institusi kewangan menawarkan skim insurans bagi melindungi dan menyokong sumber kewangan pelajar untuk keperluan pendidikan jangka panjang.

Beliau berkata, langkah itu selaras dengan harapan Perdana Menteri, Datuk Seri Dr Mahathir Mohamad, yang melancarkan Kempen Menabung Kebangsaan, November lalu.

"Saya percaya institusi kewangan harus menyediakan skim insurans untuk menyediakan perlindungan di samping menyokong pelajar di negara ini," katanya di pelancaran Program Perancangan Pendidikan Bakal Graduan KL Mutual dan Peraduan Bakal Graduan KL Mutual-New Straits Times (NST), di sini, hari ini.

Teks ucapannya dibacakan oleh Timbalan Ketua Pengarah Jabatan Pendidikan Sekolah, Kementerian Pendidikan, Datuk Mat Nor Daim. Majlis anjuran NST itu ditaja oleh Kuala Lumpur Mutual Fund Berhad (KL Mutual), dengan kerjasama Subang Parade.

Hadir sama ialah Pengerusi KL Mutual, Nizam Razak dan Editor Bersekutu NST, Rose Ismail.

Najib berkata, jika institusi swasta giat menawarkan perkhidmatan dalam bidang pendidikan, ia membantu mengurangkan bebanan belanjawan dan sumber kerajaan.

Sehubungan itu, beliau memuji langkah mewujudkan Program Perancangan Pendidikan Bakal Graduan KL Mutual, selaras usaha Kementerian Pendidikan menggalakkan institusi kewangan menyertai skim simpanan pendidikan.

Program Perancangan Pendidikan Bakal Graduan KL Mutual bertujuan menggalakkan masyarakat menyertai pelan simpanan pendidikan bagi anak-anak di masa depan.

"Saya turut menghargai hasrat KL-Mutual menjadikan enam sekolah di Kuala Lumpur/Lembah Klang sebagai anak angkat selaras langkah kementerian menggalakkan institusi kewangan mengambil anak angkat di kalangan sekolah," katanya.

Sementara itu, Nizam berkata program mengambil sekolah sebagai anak angkat itu dijalankan dengan kerjasama NST.

Mengenai Peraduan Bakal Graduan KL Mutual-New Straits Times, Nizam tidak menolak kemungkinan acara itu dijadikan program tahunan.

Seramai 25 kanak-kanak berusia di antara 10-12 tahun menyertai pertandingan akhir peraduan itu. Mereka dipilih daripada lebih 100 peserta yang menjawab beberapa siri soalan menerusi akhbar NST selama seminggu sejak 20 Januari lalu.

Calvin Choo Wing Wa, 10, dari Kuala Lumpur menerima hadiah dana amanah saham KL-Mutual bernilai RM15,000 apabila berjaya menduduki tempat pertama; Gayathi Sukumaran Nair, 11, yang menduduki tempat kedua, menerima dana bernilai RM10,000 dan Jennifer Jayeswari, 11, di tempat ketiga meraih dana RM10,000.

(END)